

Un premi pal zovin Patrick Romanin te “Zornade internazionâl de lenghe mari”.

Si è diplomât ae scuele secundarie di 1ⁿ grât cuntun aprofondiment multimediâl apassionât sul poete Pierluigi Cappello

Te “Zornade internazionâl de lenghe mari”, la ARLeF (Agenzie Regjonâl pe Lenghe Furlane), midiant dal so president Eros Cisilino, e à decidût di **premiâ il zovin student Patrick Romanin di For Davôtri**, cuntune targhe speciâl pal so **lavôr apassionât**, presentât al esam pal diplome de scuele secundarie di 1ⁿ grât, sostignût tal Jugn dal 2018 (cumò Patrick al frecuente il Liceu classic a Tumieç), e **dedicât al poete furlan Pierluigi Cappello**.

«Dispès, cuant che cualchi autôr nus lasse, si displasin di no vê vût avonde ocasions o di no vê vût avonde timp par cognossilu tant che o varessin desiderât - al à declarât il president Cisilino -. Te zornade de lenghe mari, cussì impuartante pal Friûl e pal Furlan, il zovin e brâf Patrick nus ufris un rai di lûs che al esalte un dai nestris autôrs plui amâts, Pierluigi Cappello, un zigant zentîl de leterature furlane».

Za vie pal an scolastic precedent, cul professôr di talian Andrea Disint, tes oris di lezion dedicadis a Cappello, Romanin al jere restât une vore maraveât des lirichis dal nestri bravissim autôr. Une espression poetiche (par talian e par furlan) che il so ricuart, magari cussì no, al è stât rinfuarçât de muart di Cappello tal Otubar dal 2017. Patrick si à comprât e si à let ducj i siei libris, e al à tignût cont i materiâi di stampe che a contavin i fats de sô vite, i tancj ricognossiments ricevûts e lis oparis dal artist, une vore preseadis ancje cetant lontan dai confins de sô tiere di divignince.

Par prontâ chê sorte di “tesine”, che al è compit di ducj i students che si presentin al esam pal prin diplome scolastic, Romanin, cun passion, al à decidût di pontâ dut su Cappello cuntune esposizion multimediâl (peraulis, musiche, imagjins) sul poete, e coinvolzint, in bande dal talian, ancje chês altris materiis di studi tant che la gjeografie (cuntun aprofondiment su Scuse, paîs di divignince di Cappello), la storie (cui fats dal taramot dal 1976), la art (doprant i dissens di Pia Valentinis pal libri par fruts di Cappello: “Ogni goccia balla il tango”) e la musiche, proponint lis notis e lis cjançons par furlan di Elsa Martin, dedicadis a Cappello.

Une esposizion che e à fat emozionâ dute la Comission e che e à fat vuadagnâ a Patrick un 10 taront che, sul diplome, cu la medie di chei altris vôts, al à permetût di promovi il student cuntun 9 complessîf ben meretât.

La Zornade internazionâl de lenghe mari e je stade istituide tal 1999 de Unesco, par promovi la diversitât linguistiche e culturâl e il multilinguism. E je celebrade in dut il mont par ricuardâ un episodi dramatic capitât ai 21 di Fevrâr dal 1952, cuant che 4 students bengalês de Universitât di Dhaka (ma tes zornadis daspò si zontarin ancje altris), a forin copâts de polizie di chel che in chê volte al jere il Pakistan orientâl, intant che a scombatevin par otignî la uficialitât de lôr lenghe, il bengali.

Udin, ai 21 di Fevrâr dal 2019

INFORMAZIONS PE STAMPE - INFORMAZIONI PER LA STAMPA

Ufficio Stampa ARLeF CALT relazioni pubbliche Tel. + 39 0432 229127 / **e-mail: arlef@caltpr.it**

Adriano Del Fabro - mob. + 39 338 3245229 / Adriana Cruciatti - mob. +39 335 6853775

<<<<<<<<<<<<